



Torah écrite (pentateuque) - Lévitique

Chapter 9

- 9,1 ויהי ביום השמיני, קרא משה, לאהרן ולבניו ולזקני ישראל.
- 9,2 ויאמר אל-אהרן, קח-לך עגל בן-בקר לחטאת ואיל לעלה--תמימים; והקרב, לפני יהוה.
- 9,3 ואל-בני ישראל, תדבר לאמר: קחו שעיר-עזים לחטאת, ועגל וכבש בני-שנה תמימים לעלה.
- 9,4 ושור ואיל לשלמים, לזבח לפני יהוה, ומנחה, בלולה בשמן: כי היום, יהוה נראה אליכם.
- 9,5 ויקחו, את אשר צוה משה, אל-פני, אהל מועד; ויקרבו, כל-העדה, ויעמדו, לפני יהוה.
- 9,6 ויאמר משה, זה הדבר אשר-צוה יהוה תעשו--וירא אליכם, כבוד יהוה.
- 9,7 ויאמר משה אל-אהרן, קרב אל-המזבח ועשה את-חטאתך, ואת-עלתך, וכפר בעדך, ובעד העם; ועשה את-קרבת העם, וכפר בעדם, כאשר, צוה יהוה.
- 9,8 ויקרב אהרן, אל-המזבח; וישחט את-עגל החטאת, אשר-לו.
- 9,9 ויקרבו בני אהרן את-הדם, אליו, ויטבל אצבעו בדם, ויתן על-קרנות המזבח; ואת-הדם יצק, אל-יסוד המזבח.
- 9,10 ואת-החלב, ואת-הכלית, ואת-היתרת מן-הכבד, מן-החטאת--הקטיר, המזבחה: כאשר צוה יהוה, את-משה.
- 9,11 ואת-הבשר, ואת-העור, שרף באש, מחוץ למחנה.
- 9,12 וישחט, את-העלה; וימצאו בני אהרן אליו, את-הדם, ויזרקו על-המזבח, סביב.
- 9,13 ואת-העלה, המציאו אליו לגמתייה--ואת-הראש; ויקטר, על-המזבח.
- 9,14 וירחץ את-הקרב, ואת-הכבדים; ויקטר על-העלה, המזבחה.
- 9,15 ויקרב, את קרבן העם; ויקח את-שעיר החטאת, אשר לעם, וישחטו ויחטאוהו, כראשון.
- 9,16 ויקרב, את-העלה; ויעשה, כמשפט.
- 9,17 ויקרב, את-המנחה, וימלא כפו ממנה, ויקטר על-המזבח--מלבד, עלת הבקר.
- 9,18 וישחט את-השור, ואת-האיל, זבח השלמים אשר לעם; וימצאו בני אהרן את-הדם, אליו, ויזרקו על-המזבח, סביב.
- 9,19 ואת-החלבים, מן-השור; ומן-האיל--האליה והמכסה והכלית, ויתרת הכבד.
- 9,20 ושימו את-החלבים, על-החזות; ויקטר החלבים, המזבחה.
- 9,21 ואת החזות, ואת שוק הימין, הגיף אהרן תנופה, לפני יהוה--כאשר, צוה משה.
- 9,22 וישא אהרן את-ידו אל-העם, ויברכם; וירד, מעשת החטאת והעלה--והשלמים.
- 9,23 ויבא משה ואהרן, אל-אהל מועד, ויצאו, ויברכו את-העם; וירא כבוד-יהוה, אל-כל-העם.
- 9,24 ותצא אש, מלפני יהוה, ותאכל על-המזבח, את-העלה ואת-החלבים; וירא כל-העם ויראו, ויפלו על-פניהם.